

INUIT ATAQATIGIIT INATSIARTUNI



UPA2023/149
19. April 2023
Hans Aronsen

Namminersorluni inuussutissarsiutimik aallarnisaaneq ingerlatsinerlu ajornannginnerulerlunilu orniginarnerulernissaa anguniarlugu qanoq iliorsinnaanerluta pillugu oqallisissiatut siunnersuut.

(Inatsisartunut Ilaasortaq Nivi Olsen, Demokraatit)

Oqaaseqaat:

Oqallisissiarineqartumi maluginiarparput suliffeqarfik ataaseq aammalu kommunemi ataatsimi kommunalbestyrelsit borgmesteria ilanngullugu uparuarneqartut ajortoqarneranik paasinninnginnerarlugit, innersuussutigineqarpoq tusagassiutitigut saqqummersimasoq.

Saqqummersitami suliffeqarfik illumik atorneqannginneragaasumik pisiniangikkuni attartorumalluni suliniuteqarsimavoq, oqallisissiatut ima nassuarsimavaa:

“Uani kommuunerisaq aporfissalersuutinik nutaanik tunniussisarsimavoq, ajoraluartumillu suliffeqarfiup ineriartuutigisinnaasaanik siuariartuutissaraluanillu ajutoortitsisimalluni. Ilutigisaanik kommuunimi borgmestererisaq, IA sinnerlugu qinigaasimasoq, suliamut atatillugu kommunemiit sullissineq sortaatigut ajortortaqaarnerasoq paasisinnaasimangilaa”

Tusagassiutitsigut allaaserisaq oqallisissiatut innersuusiffia atuaraanni ima allassimavoq:

“Borgmesteri Ane Hansen (IA) tassunga tunngatillugu oqarpoq inatsisit malitassallu naapertorlugit Kommune saaffiginnissummik suliarinnissimasoq, taamaammallu kommunip illuutai tuniniarneqassatillugit attartortussarsiuunneqartillugilluunniit periusissat tamarmik malinneqartut:

- Kommunalbestyrelse suliamut tunngatillugu ilisimatinneqarnikuullunilu oqaluuserinninnikuuvoq, aalajangiunneqarnikuuvorlu illuut pineqartoq tamanut pisiariumannittussarsiuunneqassasoq, akisunerpaamillu pisiariumannittup pisiariumaarpaa, Ane Hansen Sermitsiaq.AG-mut naatsumik taamak akissuteqarpoq.”

INUIT ATAQATIGIIT INATSIARTUNI



Paasisimanninnginnermik paasinnittaaseqarnermilluunniit imaqaangilaq, taamaallaalli inatsit, malittarisassallu malinneqartut ersarissarneqarluni, paaserusunnarporlu oqallisissiorup borgmesterip paasinnissimanninnginneranik oqarnermini suna tunngavigalugu taamak oqarnersoq sumillu pissarsiarisimaneraa oqaatsini nassuaqqullugu.

Oqallisissiaq pissanganaraluartoq uggoraara suliffeqarfik ataaseq borgmesterilu ataaseq toqqaanaq pineqarlutik allaaserineqarsimaneranut tunngavilersuutaasimammata.

Nunatsinnimi suliffinnik aallartitsiniarneq pingaaruteqarluinnartuuvoq aamma inatsisitigut tamatta malinnilluta ingerlanissarput pingaaruteqartorujussuuvoq, paasinnissimanninnginnermillu oqaatiginninneq uani uanga nammineq paasisinnaangilarattaq tassami malitassat inatsisillu malinneqartussaapput taakku avaqqullugit sulisitsiniartoqarsinnaangilaq.

Qanorluunniit ataasiakkaat tapersersortigigaluaaraanni allamik suliaqarsinnaangilagut tassa inatsisit malitassanillu malinnilluta suliat naammassiaruaarneqartartussaapput paasinnikkaluarutta paasinninngikkaluaruttaluunniit apeqqutaangilaq inatsisaatsuliorsinnaangilagut.

Malitassat inatsisillu assigiinngitsut malikkunnaarlugit ingerlatsinermik aallartissasugumik oqallisissiorup eqqarsateqarluni oqallisissiarinninniarpa?

Kommunalbestyrelset aqutsinermut inatsit tunngavigalugu sulisussaapput. Tassanilu unioqutitsisoqarsimappat kommunit nakkutilliisui taakkupput iliuuseqartussat. Ilisimavarpulli kommunit pigisaminnik tuniniaassagunik, pinngitsooratik innuttaasunut tamanut neqeroorummik suliaqartussaataammaat. Suliffeqarfimmik, inummilluunniit aalijangersimasumik pisisussamik, attartortugassamilluunniit toqqaaginnartoqarsinnaangimmat.

Taariikkama saniatigut kommunini assigiinngitsuni ineriartortitsinissamut suliaqartunik pilersitsisoqartarpoq assersuutigalugu: Innovation South Greenland, Nalik Ventures aallarnisaasunut siunnersuullutillu aningaasatigut tapiissuteqarnissamut attartortitsinissamullu periarfissaqartitsipput.

Suliffeqarfimmit namminersortunngorniarlutik aallartitsiniartut ingerlareersullu unammilligassaqarneri ilisimavarpup assersuutigalugu kartorfilinik tuniniaasartut, nioqutissiatik ukiut tamaasa tonserpassuannorlugit eqqaannarneqartut isiginnaaginnartariaqartarpaat.

INUIT ATAQATIGIIT INATSIARTUNI



Tassanilu niuertut pisisartullu sunik piserusunnerat apeqqutaalluinnartuusoq tamatta ilisimavarput, niuertut pisisartullu pinngitsaalillugit pisiassaanik aalijangersimasunik pisitsissinnaanngilagut, kisianni aqqutissiuvisinnaavugut malitassanik inatsisinillu sanaartornikkut, pisinnaatitaaffillu taanna inatsisartuni kommuninilu qinikkatut periarfissagissaarfigaarput, taamaammallu Inuit Ataqatigiit sinnerlugit qinikkatut kartorfilinik ajornannginnerusumik niuertoqalernissaa pisisartoqalernissaalu anguniarlugu ujartuilluta aallartikkatta kinguneraa Naalakkersuisut suliamik ingerlatsilersimasut tusagassiutini tusarliunneqarmat.

Innersuussutigissavaralu qinigaqatitsinnut namminersorluni suliffeqarfiuteqarluni ingerlatsiniarnermi aporfinnik ilisimasaqarunik allannguinnissamut periarfissanik ujartueqqullugit, pineqartut peqatigalugit taakkuummatami ulluinnarni atukkaminnik, aporfinnik ilisimasaqarluartut taakkulu qanoq iluarsineqarsinnaanerini tikkuusisinnaasut.

Tikkuussallu taakku iluarsiivigineqarnissaat anguniarlugu suliaqarlutalu sinaakkusersuisariaqarpugut, aporfiit piusut suussuserserialugit tigussaasumik sulianik ingerlatsilerniarta pineqartut peqatiserlugit.

Qujanaq.